

淡

墨

錄

二



淡 墨 錄

(二)

李調元 著

叢書集成初編

(補印本)

淡

墨

錄

二冊

一九三九年十二月初版
一九五九年十月補印

李調元著作

商務印書館出版

上海虹口印刷廠印刷

淡墨錄卷八

雲結名字

武進趙熊詔號裘萼恭毅公申喬長子也生前一夕祖夢神授一軸雲彩幡結熊詔二字遂以爲名果中康熙四十八年己丑狀元官至侍讀是科榜眼桐城戴田有會元也以所著南山集銷燬□□探花泰州繆沅字湘芷官至禮部侍郎

文勤理學

漳浦蔡文勤公世遠字聞之漳浦人康熙己丑進士出安溪李文貞公之門選庶吉士是時文貞以程朱之學教後進公故習宋儒書既見文貞卓然以聖賢爲必可學既歸巡撫海康陳清端公請主鰲峯書院雍正改元特召還朝授編修入內廷侍皇子講讀卯入酉出者十年歷陞至禮部右侍郎皇子親王並加禮敬郡王就學者自署受業遭逢極儒者之榮矣嘗修復古禮行于鄉農人販夫皆知嚮化環居數十里無博塞者二十餘年以地居梁山麓學者稱梁山先生卒年五十二諡文勤所著二希堂古文詩十五卷二希云者公自記云學問未敢朱文公庶幾其真希元乎事業未敢望諸葛武侯庶幾其范希文乎未幾公又與高安朱文端編歷代名儒名臣循吏可見其志矣

文敏好佛

張文敏公照字得天華亭人善書康熙己丑庶吉士歷官至刑部尚書從來善書者皆謚文敏如元趙孟頫明董其昌本朝自嵇曾筠以治河謚文敏外照一人而已文敏性地高明好佛其詩左磕右觸皆禪語也

學使之冠

長洲惠士奇康熙戊子解元己丑進士授編修兩任粵東提學專以經學取士爲數十年粵東學使之冠官至侍讀著有半農易禮春秋諸說歸耕人海等集

請託不行

宿遷徐用錫字壇長未遇時赴都試如廁見大肉塊遍身有眼知爲太歲用錫記書載鞭太歲者轉禍爲福因與家丁次第笞擊每擊一眼則遍身眼愈加閃爍是歲登薦連捷己丑進士以李文貞薦改庶吉士官至侍講乙未充會試房考關節不行有徐覺民者御史董之燧門生也以用錫不受請託聳之燧叅用錫把持科場聖祖察其情將本發還

文襄治河書

靳文襄公輔字紫垣遼陽人康熙己丑特賜翰林編修改兵部郎中進武英殿學士兼禮部右侍郎巡撫安徽十六年河決江淮上知其才命總督河道兵部尚書治河十年決排疏濬因勢利導使三瀆各得其所以而河以大治卒謚文襄著有治河書十二卷河上至今設祠祀之柚堂筆談靳文襄過邯鄲呂祖祠見

有題詩于壁云。富貴榮華五十秋。縱然一夢也風流。而今落拓邯鄲道。敢與先生借枕頭。墨跡未乾。追踪其人。乃秀水陳天裔也。一見遂爲知己。天裔名潢。明測量之法。復精奇門。與文襄爲一人之交。凡河防事宜。得失變態。並有先見。一時河道以下諸員。皆受業爲弟子。二十三年五月。上南巡。于行在問斬輔曰。爾有何等通今博古之人。輔以陳潢對。召見。特賜參議道銜。今配饗文襄祠。

書畫得父筆法

王世琛。字寶傳。長洲人。康熙五十一年壬辰狀元。明大學士鑿六世孫。父銓。字東發。丁卯副榜。官至禮部給事中。善繪事。書法。世琛風度恬雅。工詩文。書畫得父筆法。由修撰遷少詹事。視學山左。未竣。卒于官。是科榜眼歸安沈樹本。字厚餘。少時聖駕南巡。獻西湖十景迴文稱旨。探花長洲徐葆光。字亮直。亦以南巡獻詩賦稱旨。被取入京。是科不第。欽賜一體殿試。五十七年。奉旨冊封琉球。賜一品服。撰中山傳信錄。著有二友齋集。

好收名士

李紱。號穆堂。臨川人。康熙壬辰庶吉士。由編修歷官都察院副都御史。兵部侍郎。巡撫廣西。總督直隸。以叅河撫田文鏡落職。紱爲人矜張。愛才若命。累掌文衡。好收羅名士。以至下第者皆不服。如辛丑充會試副總裁。頗稱得人。入館選者至六十五人之多。前此未有也。榜後下第者擁紱寓。以石碎其門。欲剪其鬚。北城御史舒庫奏聞。以紱不奏聞革職。發河工効力。復起官。上常以紱爲人問。康五瑞奏言。倨詞疾色。人

畏其鋒。雖好收名士。却未得財賄。上始釋然。命纂修八旗通志。所著穆堂初稿五十卷。門人四川安居閬撫王恕所訂也。

竹雲

王澍。字虛舟。號籛林。金壇人。康熙五十一年壬辰進士。選庶吉士。改吏部主事。歷員外。澍以工書名海內。有竹雲題跋。竹雲者。雍正丙午夏南還。經淮陰泛珠湖。仰見天際白雲如竹十百枝。枝皆具。下有雲片若怪石。儼然圖畫。同行沈凡民曰。此先生退老之徵。爲作刻章。初秀水錢香樹見澍于京邸。左圖右史。見其積帖至梁栢間。听夕丹鉛。辨析窮苗。髮不少置。戲曰。子欲爲張仲楊柯丹邱其人耶。澍曰。人皆有癖。樂此不疲也。所著有法帖考正。尤爲精覈。

壬辰三庶吉

壬辰三庶吉。一顧嗣立。字俠君。長洲人。以散館例外用。不就補。歸不出。著秀野草堂元詩選初二三集。注昌黎飛卿二家詩。注一杜詔。字紫綸。無錫人。以養親歸不出。與道士榮連。僧天鈞。結九龍三逸社。選唐詩叩彈集。一程夢星。字伍喬。取南唐書伍喬居廬山見星而名。不就職。歸。註李義山詩。皆同榜進士。

原祁高弟

王敬銘。字丹思。嘉定人。康熙五十二年癸巳狀元。授修撰。工畫。爲太倉侍郎王原祁高弟。是科會元。爲歸安孫見龍。

贊見十二兩

溧陽任蘭枝字香谷工制藝未遇時走田埂上遇一人口啣一刀手持兩刀披髮赤面見蘭枝偃身而過行半里入喪者之家知爲煞神人卜其必貴後登康熙癸巳榜眼雍正元年由編修督川學時無學田養廉奏明諸生贊見以十二兩爲止貧者減半人情悅服六年陞閣學奉命偕副都御史杭宜祿使安南國王備龍亭以迎覆命稱旨陞工侍晉禮部尙書

舉人入直內廷

魏廷珍字君璧直隸景州人以李文貞公薦由舉人入直內廷同王蘭生梅穀成在館充校對官編樂歷淵源諸書常被命與大學生李文貞參酌學習樂律韻學登癸巳探花官至工部尙書

千叟宴詩

吳文簡公襄字七雲青陽人癸巳庶吉士初襄父與一僧善僧來輒留手談僧患足疾坐山中一日其父見僧自外至問之不答徑趨後室跡之內報夫人生子矣由編修官至禮部尙書康熙壬寅襄年六十春二月恭逢千叟宴襄與焉謝恩詩有六句今列千官宴兩榜原登萬壽科之句見片刻餘間錄

孫文定奏疏

孫嘉淦字錫公號懿齋山西興縣人康熙五十二年聯捷癸巳進士改庶吉士授檢討以直言敢諫受知世宗雍正四年奉上諭孫嘉淦居官聲名頗好着提督順天學政五年前學臣吳襄任滿保舉生員張鎮

王澤新、劉鵬振、朱函夏四名不稱旨。命嘉淦重舉。陞刑部左侍郎。辦理吏部侍郎事。仍兼管順天府尹。國子監祭酒事。八年庚戌會試。充副總裁。先是蔚州宗伯李渭涓爲祭酒時。彙題名諸碑而鏤之板。自明宣德五年林震榜始。迄今十有餘年未刻。是科嘉淦爲考官。又兼司成。始續刻以補之。旋陞都察院左副都御史。乾隆十年十一月秋審冊內有福建蔣邦齡致死族匪一案。嘉淦力爭以爲不可。因上疏曰。查舊例同族之中。果有兇悍不法。偷竊奸究之人。倘事起一時。合族公憤。不及鳴官。以家法致死。報官審明死者所犯。應死與不應死者。將爲首者分別擬杖。予減等免抵。嗣于乾隆二年五月內。據廣督鄂奏稱。舊例雖屬體順人情。但恐朋比串害。地方官豈能洞燭無遺。倘民間恃有減等免抵條例。相習成風。其中難免冤抑。奏請酌刪。經刑部律例館議稱。族大人衆。賢愚莫辨。或以富而招衆怨。剛直而致全仇。一人煽誘。羣相附和。共挾微嫌。輒圖報復。因而駕捏串害。難免冤抑之處。況生殺乃朝廷之大權。如有不法。自應明正刑章。不宜假手族人。以開其隙。奏請刪除在案。臣等伏思舊例乃一時創懲兇悍權宜之法。行之久遠。必滋流弊。夫族衆之中。愛憎多端。或以侮慢招衅。或以戇直生嫌。或假義忿。以樹己威。或借公義。以報私怨。一豪強倡論于先。衆朋黨附和于後。倉猝致死。情罪難明。如一家之中。莫尊于祖父母父母。其子孫若違犯教令。毆之殺之。宜無不可。然毆殺則律應滿杖。故殺則律應杖六十。徒一年。是祖父母父母之于子孫。尙且不得擅殺。何況其他。再提姦例內。卑幼不得犯尊長。犯則依故殺伯叔母姑兄姊律科罪。尊長殺卑幼。亦按服律擬。誠以倫紀攸關。防微杜漸也。夫以朝廷之尊。明罰勅法。于凡應死之罪人。猶令法司詳加核

議至于法無可道。必令三次覆奏。聖天子之用刑。如此慎重。奈何任匹夫之好惡。操生殺之大權。橫行于一族乎。是舊有之例。必不可存。族匪之條。不須另設。于比擬定罪。則當臨時參酌。虛衷援引。務使輕重得宜。方爲允協。至所稱族人致死族匪。則死者必有罪之人也。其人罪應死者。則有本犯應死而擅殺之條矣。不應死而拒捕者。則有拒捕格殺之條矣。毆殺之者。則有不拒捕而擅殺之條矣。束縛之。勒埋之者。則有已就拘執而擅殺之條矣。等語。奉旨交部議。部覆擬。今蔣邦齡以卑幼臨時拒捕。似應比照拒捕律減等。查拒捕之條內。若罪人持杖拒捕。其捕者格殺之。及囚逃走。捕者逐而殺之。若囚窘迫而自殺者。皆勿論。若已就拘執。及不拒捕而殺之。各以鬪殺傷論。本犯應死而擅殺者。杖一百。又律註。以捕亡一時忿激。言若有私謀。另議等語。律意誠屬詳明。律註更加慎重。蓋應捕之人。若已就拘執而擅殺。尙以鬪殺抵。若有私謀。仍分別另議。此指捕亡之條而言。與謀故致死族匪不全。至族人不法。自應鳴官。按其所犯情罪。依律究治。若預蓄殺機。羣相毒謀。肆行慘殺。則謀故顯然。豈得藉義忿公議之名。遂與捕亡一律科斷。而竟無區別乎。不惟卑幼不可以此加于尊長。卽尊長亦不可以此施于卑幼。且案情百出。事難預定。況現在辦理此等案件。其中情節。果有一綫可原者。或經刑部聲明。或奉特旨量爲寬減。如蔣邦齡律應斬決。改擬監候者。不一而足。又何嘗專任重律以爲治乎。應無庸議。奉旨依議。乾隆四年。授山東副總河。是年陞兵部尙書。直隸總督。乾隆四年。協辦大學士卒。予祭葬。謚文定。嘉淦立朝剛直。多面折廷爭。不避權貴。天下想望丰采。故乾隆初年。有匪人託嘉淦名作假疏。後得其人。置于法。

時文

上海蔡嵩康熙癸巳進士。雍正初年。由編修督學雲南。奏請時文以黃淳耀爲宗。刊示士子。上諭云。朕殊不以爲然。復又奏請以唐順之易之。而以本朝熊伯龍韓荃添入。上又諭云。此二臣文名固不待言。但古人已往。後人尙有偏私之論。何況本朝人物耶。汝自爲猶可。不便批定也。

嚴禁那帑捐官

向日貞字一存。成都人。康熙癸巳進士。改庶吉士。授廣東道御史。因捐納例開。各官多私那國帑。捐陞納職。因而虧空。雍正元年。上請嚴禁那帑捐官。疏曰。國用資于錢穀。錢穀寄于有司。州縣責成。首嚴虧空。乃有不法之員。視捐款爲倖進之階。借國帑爲營私之具。聞開捐例。百計求成。權移公帑。暫遂私謀。先用卽用。爲自己而捐陞。盈百盈千。爲子弟而納職。而又巧于奉迎。工于趨奉。上司素受其重賄。臨時顧惜其私情。曲爲狗庇。轉接後人。陞者居于局外。旣謝責而不擔。受者墮其術中。雖後悔而莫及。卽新任略有剛常。堅詞不接。乃上司啣其夙怨。必至中傷。乃如之人。上虧國帑。下累後官。貽害甚于盜臣。侵蝕工于鼠竊。請著定例。嚴加處分。上司有隱護之員。無論離任現任。令其賠補。子弟有捐納之職。不拘先用後用。革其職銜。如此則狗庇可除。舊官無巧脫之計。虧空可出。離任無掣肘之虞矣。奉旨交部議。如所奏行。先是科場停止鄉會試錄。是年復奏。自癸卯科始。仍請刊行。日貞以通籍後避諱。改名日正。少有神童之目。制藝敏捷。出黃際飛越之門。所刻有程墨大小題文憲。蜀中論時文者。必首稱焉。見例案全集。

摸龍阿太孫

仁和姚三辰康熙癸巳進士由編修官至吏部侍郎相傳三辰祖以外科世其家常採藥持藍人呼爲姚藍兒一日採藥歸醉墮西溪以手摸石旋卽有漩蠕蠕而動負姚而上驚以爲蛇回視兩目如燈照見鬚角委姚地上騰空而去始知乃龍也兩手觸漩處香數月不散以之撮藥應手而愈故人呼爲摸龍阿太每愈人病不受謝孫官二品人以爲陰德所感云

兄弟同榜翰林

長洲李錦字爛文康熙五十四年乙未會元由編修官至侍讀弟文銳字鼎臣同榜傳臚由編修官至司經局洗馬兄弟同榜同翰林

乙未鼎甲弟兄

康熙乙未狀元徐陶璋字端揆長洲人官修撰兄模字文表戊戌進士榜眼繆曰藻字文子吳縣人官洗馬弟曰芭字武子雍正癸卯進士官編修探花傅王露字良木會稽人編修弟王雯字孔木丙辰進士皆有文名

墨竹

歸安吳應葵榜名應楨以避諱改名字小眉康熙乙未進士工詩好寫墨竹嘗于扇上寫竹石小景錢銀臺主敬見之題云澹烟濃墨掃雲腴胎脫東坡鳳尾圖又見蟹爬沙滿紙千秋一炷屬菱湖菱湖應葵所

居也。晚自號青靈山人。官至工部侍郎。湖北巡撫。

與利除弊

成文。康熙五十四年乙未進士。改庶吉士。授編修。滿洲人。雍正元年正月。引見。妄奏。上以爲不知所陳何語。暨令諸翰林各據所知條奏。成文摺內有與利除弊等語。上以皇考治人有何弊。朕何以除之。又奏請八旗十五歲以上俱令讀書。如此則挑取護軍。復用何人。又復懇辭教習二十阿哥之職。可謂狂妄胆大。着革職。跟隨二十阿哥行走。若改過則已。不必鎖拿監禁。

戊戌會狀

康熙五十七戊戌。狀元常熟汪應銓。字杜林。官至贊善。會元則嘉善楊爾德也。庶吉士。改給事中。視學廣東。

河南學政養廉

康熙戊戌。榜眼桐城張廷璐。字寶臣。大學士英第三子。督學河南。除夫馬取給地方外。其幕友束修。家口養贍。俱無所出。上聞之。問其兄戶部尙書廷玉。遂以實對。上命河撫田文鏡酌給盤費。文鏡議。夫馬自不便取給地方。以至派累。議每歲夫馬銀一千六百兩。幕修銀一千兩。養贍家口銀一千兩。供給雜用銀二千兩。每歲六千六百兩。三年總需銀二萬兩。故河南學臣養廉較他省獨優。自文鏡爲廷玉弟廷璐始也。

學政告病

仁和沈錫輅。康熙戊戌探花。提督山西一年餘。以患病解任。

幾釐之失

錢塘徐本。康熙戊戌庶吉士。授編修。歷官至安徽巡撫。雍正七年。奏報各屬麥收分數。有幾分幾釐之語。上諭云。不知所謂幾釐者如何見之。甚覺可笑。傳旨申飭。本復具摺請罪。上諭幾釐之失。尙爲小過。無非欲汝務實爾。官至工部尙書。大學士。

布衣奉使

孫致彌。字愷似。號松坪。嘉定人。明登萊巡撫火東公之子。康熙初。靖南王三世子哆囉額福耿者。木本中丞舊裨也。能詩。嘗與致彌唱酬。因言于上。上方命御前大臣採訪朝鮮文獻。致彌以布衣賜二品服。臨軒策遣從往。士論榮之。奉使詩有甘父漫教從博望。馬周只恐負常何。謂噶烏兩侍衛。及正公太保也。戊戌始登進士。改庶常。入直內廷。假歸。又以民爭復漕事罷。旋得釋。補散館。授編修。官至侍讀學士。卒于京。有秋左堂集六卷。

聊城二狀元

康熙六十年辛丑。狀元鄧鍾岳。字東長。號悔廬。聊城人。聊城自丙戌開科。傳以漸後。鍾岳繼之。一縣二狀元。亦盛事也。工書法。友愛諸弟。或暮歸過時。必俟于門。諸弟不敢夜出。大魁後。同年百七十餘人。無一不泱洽款曲。朝議推重之。乙卯江南副主考。隨督學江南。著有寒香閣集。是科榜眼爲福建長樂吳文煥。探

花爲河南上蔡程元章字冠文官至尙書雍正九年總督浙江上命效法李衛而元章事事與衛齟齬人服其剛直。

再開浙江鄉會試

王蘭生直隸交河人以李文貞公薦與魏廷珍梅穀成入直內廷編纂律歷淵源康熙六十年辛丑不第欽賜舉人一體殿試二甲一名改庶吉士授編修四年海寧查嗣庭案起奉旨停浙江鄉會試特命蘭生督學浙江閱三年蘭生奏士風不變上諭准其照舊鄉會試官至閣學。

八仙會

黃之雋字石牧號唐堂華亭人薦舉博學鴻詞康熙辛丑二甲二名庶吉士在館日聚同巷八人爲八仙會以杜甫飲中姓氏爲上八仙人取其一一以自署又以世俗所傳鍾離權呂巖輩分署之爲下八仙彼以上八仙呼此以下八仙應故爲參錯不得呼姓字呼年兄呼者罰由編修至中允提學福建鐫級歸不出優游林下十餘年卒著有香屑集十八卷皆集唐人句爲香奩詩凡古今體九百三十餘首對偶工整渾若天成而一一如自己出可謂前無古人後無來者。

元宵聯句

錢香樹先生諱陳羣嘉興人康熙辛丑庶吉士授編修官至刑部侍郎在籍食尙書俸先生早歲以詩名亞于長洲沈德潛天下稱詩者必歸二公自館選後受知今上凡聖駕南巡御製詩俱寄沈與先生賜和。

異典也。先生舊宅在金陀坊。先大夫石亭公令秀水時。予以諸生隨任。命受業門下。時值戊寅。聖駕南巡。召試諸生。題爲春蠶作繭。先生命予擬作。余有不檢。還自織。非彈却成丸句。先生閱之。驚喜云。昔年曾侍上于乾清宮。元宵聯句。上思如湧泉。言言珠玉。僕得一聯云。風團謝家絮。霜點洞庭橙。一時王公大臣皆推僕爲五字長城。固不敢當。今見足下九字韻一聯。與前事足相印證也。他年成進士。入翰林。聲名雀起。余日望之。後予于癸未入翰林。先生祝萬壽來京。年已七十矣。見之甚喜。曰。吾言固不謬也。謚文端。樹齋集十卷。大司農汪由敦謹堂序。

辛丑多名臣名儒

康熙辛丑科名臣名儒多出其中。官尙書者一。秀水錢陳羣。官侍郎者二。鄞縣邵基。勵宗萬。官總督者二。上蔡程元章。冠文。平越王士俊。灼三。巡撫者四。新喻晏斯盛。一齋。滋陽喬世臣。丹葵。安居王恕。中安正。白旗漢軍孫國璽。名儒則會稽魯曾煜。啟人秋睦。孝感夏力恕。宜興儲大文。六雅。閩謝道承。又紹。金谿馮詠蘊。歸安陸奎勳。陸堂。皆是科庶吉士也。

硃批謝摺

湖北巡撫王士俊。貴州平越人。雍正十年八月。上賞士俊花屯絹蜜荔枝。士俊謝摺有云。縫衣有耀。頂踵皆被龍光。懷核親嘗。肺腑長含玉液。上覽之。批云。衣只被身。何及頂踵。核豈足嘗。難入肺腑。人皆以爲笑。論者謂幕賓所爲。而士俊亦失檢云。

庶吉士撰文

黃之雋工詩。尤長于古文。辛丑會試總裁大學士時爲吏部尙書。遂寧張文端公大學士時爲戶部尙書。陽城田文端公戶部侍郎儀封張清恪公副都御史臨川李公穆堂黃之雋中二十七名。同考檢討全州蔣綱檢討新安李璐時各總裁有五策通場第一之評。臨川謂曰。儲大文張符驤馮詠輩策俱佳。至于章局勻練起伏轉折得古文之法。唯子爲備。殿試第二甲第二名選庶吉士。查中翰雲標預夢之雋中四十五名。鄉榜發不驗。及合三試而名數適符。康熙後壬寅歲十一月十三日聖祖仁皇帝升遐。二十日世宗憲皇帝卽位。大禮鉅典例由翰林編檢以上撰文。掌院靜海勵文恭公詢於青陽吳文簡公曰。記新庶常有一善四六文者。吳曰。華亭黃之雋乎。公立傳之雋授數題。每奏多稱旨。庶吉士撰文自此始。于是同年平湖陸坡星奎勳嘉興錢香樹陳羣繼之。時之雋雍正元年七月奏呈中元祭聖祖文。大稱旨。次日召見養心殿。賜貂出授職編修。他日上命檢檔案。凡撰文稱狠好。稱好者列名給賞。時陳編修萬策鄧修撰鍾岳陸錢二庶常皆賜內府緞一匹。之雋得二匹。八月充日講官起居注。凡一月遇聖祖祔主太廟。乾清宮早朝兩大禮侍班躬觀其盛。有詔重修明史。用纂修官二十人之雋與焉。引見西暖閣。奉旨以中贊卽用。九月特簡提督福建學政。